

## **Balinese - Nyegerang Cakepan Sucine - Healing Scriptures**

**Pararudan 15:26 Ida Sang Hyang Widi Wasa masabda asapuniki:** “Yen kita ajak makejang saja saking sujati nyak nelebang pidabdab Ulune, tur ngamanggehang sapatitah Ulune, Ulun tusing bakal ngukum kita aji panyakit-panyakit ane suba tibakang Ulun marep teken bangsa Mesire. Ulun ene Widi ane nyegerang kita.”

**Pangeling-eling 7:15 Parasemeton pacang kasayubin antuk Ida Sang Hyang Widi Wasa** saking saananing pinakit, tur kadohang saking grubug sane ageng sane aksi semeton ring Mesir, nanging sakancan bencanane punika jaga tiwakang Ida ring meseh-meseh semetone.

**Kidung 107:20 Ida nyegerang ipun malantaran sabdan Idane, tur ngluputang ipun saking bangbang setrane.**

**Kidung 146:8 tur Ida nyedangang paningalan anake sane buta. Ida ningtingang jadmane sane sampun labuh, tur asih sueca ring kaulan Idane sane patut.**

**Yesaya 35:5 Jadmane sane buta pacang nyidayang ningalin, tur anake sane bongol pacang nyidayang miragi.**

**Yesaya 53:5 Nanging uli krana dosa-dosan iragane ipun sampun katatunin, tur ipun katigtig uli krana kajaatan sane kardi iraga. Uli krana ukuman sane tandangan ipun iraga molih seger, tur malantaran ipun katigtig iraga seger oger.**

**Yesaya 58:8 Ditu sih pasuecan Ulune lakar macaya sig kitane buka sinar aine semengan tur tatum kitane lakar enggal was. Ulun lakar tansah ngingin kita buat ngrahayuang kita. Ulun lakar nyayubin kita uli di ilehan kitane.**

**Yeremia 30:17 Ulun lakar buin nyegerang kita, Ulun lakar nguasang tatum kitane. Yadiastun musuh kitane ngraos kene: ‘Sion suba kasepekang, tusing ada anak ane ngrunguang ia.’ Ulun Sang Hyang Widi Wasa ane suba ngandika buka keto.”**

**Yeremia 33:6 Nanging Ulun lakar ngrajegang kotane ene muah mapaina kasegeran teken rakyate. Ulun lakar maicayang kerta raharja teken ia.**

**Maleaki 4:2 Nanging pabuat kita ane subakti teken Ulun, kawisesan Ulun ane ngrahayuang lakar endag buka suryane sig kitane, tur nyegerang kita buka sinar suryane. Kita lakar bebas tur liang buka godel sampine ane pesu uli badanne.**

**Matius 4:23,24 Sapangrarisipun Ida nglelana milehan ring wewengkon Galilea. Ida ngurukang anak ring perhyangan anak Yahudine tur midartayang Orti Rahayu indik Ida Sang Hyang Widi Wasa digelis pacang ngadegang Pamrentahan Idane, maliha nyegerang anake sane nandang pinakit mawarni-warni. 24 Sayan amiug gatrane ring wewengkon jagat Siria, ngeniang indik pakardin Idane. Irika anake sami pada rauh tangkil makta anak sane nandang pinakit mawarni-warni miwah anak sane nandang**

**sangsara, sane karangsukan setan, sane sakit ayan miwah anak rumpuh, tur sami pada kicen seger.**

**Matius 8:16,17 Sasampune surup surya, akeh anake rauh tangkil makta anak sane karangsukan setan. Masrana antuk baos abuku Ida nundung setane punika. Akeh malih anak sane nandang pinakit sane segerang Ida. 17 Paindikane punika mamargi kadi asapunika mangda kasidan sabda sane kawarahang antuk Nabi Yesaya asapuniki: “Ida ane nyuangin kasangsaran iragane muah nyalud sakit iragane.”**

**Matius 9:35 Kadi asapunika Ida Hyang Yesus mamargi nglelana nylajah kota miwah desa-desa makasami. Ida mapaica paurukan ring perhyangan-perhyangan anak Yahudine, tur ngortiang Orti Rahayu indik Ida Sang Hyang Widi Wasa ngadegang Pamrentahan Idane, tur nyegerang anake akeh saking saananing sakit miwah pinakit.**

**Matius 10:1 Ida Hyang Yesus raris ngandikain sisian Idane sane roras diri punika, tur icen Ida kuasa buat nundung setan miwah ngwarasang anak saking saananing sakit miwah pinakit. (Markus 3:14,15)**

**Matius 10:8 Segerangja anake sakit, idupangja anake mati, segerangja anake ane sakit lepra, tur tundungja sakancan setane. Sawireh cening suba maan ngidih, cening patut makidihang.**

**Matius 11:5 Anak buta nyidayang ningalin, anak rumpuh nyidayang majalan, anak lepra kasegerang, anak bongol nyidayang ningeh, anak mati kaidupang, tur Orta Rahayune kadartayang di pantaran anake tiwas.**

**Matius 12:15 Rikala Ida Hyang Yesus wikan ring paiguman anak golongan Parisine punika, Ida raris kesah saking irika. Akeh pisan anake sane ngiringang pamargin Idane, tur anake sakit sami segerang Ida.**

**Matius 15:30 Raris akeh jadmane pada rauh tangkil ring Ida. Wenten sane makta anak rumpuh, anak perot, anak buta, anak kolok miwah sane tios-tiosan. Anake sakit punika kagenahang ring ajeng Idane tur sami pada kasegerang.**

**Matius 17:20 Raris Ida ngandika: “Sawireh cening tunan pracaya. Guru nuturin cening: Sujatinne, yan cening ngelah kapracayan magede amun batun godeme, pedas cening nyidayang mrentahang gununge ene: ‘Makisidja uli dini kemo!’ Pedas ia bakal makisid; buina buat cening tusing ada paundukan ane tuara kasidan.**

**Markus 1:34 Ida Hyang Yesus akeh nyegerang anak sane nandang pinakit mawarni-warni miwah akeh nundung setan. Setane tan kalugra ngucap, santukan ipun pada uning sapasira sujatinnya Ida punika.**

**Markus 3:10 Akeh sampun Ida nyegerang anak, kantos sakancan anake sakit pada maseeg-seegan mangda nyidayang ngusud Ida.**

**Markus 6:5,6 Irika Ida tan mrasidayang ngwentenang praciri, sajawining wenten makudang-kudang anak sakit segerang Ida masrana kusud antuk tangan. 6 Ida rumasa angob pisan, santukan anake irika tan pisan pracaya**

**ring Ida. Ida Hyang Yesus raris mamargi milehan ka desa-desa sane wenten ring kiwa tengen kotane punika, tur mapaica paurukan ring anake irika.**

**Markus 6:13 Samaliha akeh dane nundung setan, tur katah anak sakit sane kolesin minyak tur pada kasegerang.**

**Markus 6:55,56 Raris ipun sami pada gegison mamargi milehan ngrereh anak sane sakit-sakit katrampa kayang pasareannyane, kabakta ring ajeng Ida Hyang Yesus. Ring dijaja Ida magatra, mrika ipun kabakta. 56 Kijaja Ida lunga, ka kota, ka desa-desa, wiadin ka dusun-dusun, anake sami pada makta anak sakit, kagenahang ring wantilane. Sami kedeh mapinunas ring Ida mangda kalugra ngusud tepin jubah Idane. Santukan siraja sane polih ngusud, ipun jeg seger.**

**Markus 8:23-25 Ida ngambil liman anake buta punika tumuli ipun kadandan ka tanggun desane. Wusan ngwiduhin paningalan anake buta punika, Ida raris ngusud paningalannyane saha kadulurin pangandika: "Apa ragane suba nyidayang ningalin?" 24 Anake buta punika raris maliat karep, sambilang ipun matur: "Titiang ngeton jadma, santukan ipun panggihin titiang mamargi, nanging jeleganipun tan bina sakadi taru." 25 Malih Ida ngusud paningalan anake punika, raris ipun jeg cedang ningalin, tur sami terang kakantenang.**

**Markus 9:29 Pasaur Idane: "Soroh setan ane buka keto tusing sida baan nundung sajabaning aji pangastawa."**

**Markus 16:17,18 Anake ane pracaya teken Guru ia bakal kicen praciri buka kene: malantaran nyambat adan Gurune ia nundung setan, ia lakar ngraos nganggon basa ane tawah-tawah; 18 yen ia ngisi lelipi wiadin nginum racun ia tusing bakal sengkala; ia ngusud anake gelem, anake gelem ento dadi seger."**

**Lukas 4:18 "Roh Ida Sang Panembahan malingga ring Titiang, dening Ida sampun nyelik Titiang mangda midartayang Orti Rahayu ring anake tiwas-tiwas. Ida ngutus Titiang buat ngwarah-warahang kabebasan pabuat anake mapangkeng miwah anake buta prasida jaga ningalin, saha mebasang anake sane kajajah.**

**Lukas 4:40 Rikala suryane sampun surup, anake makasami pada ngajak nyama miwah kadangnyane sane sakit, nangkil ring ayun Ida Hyang Yesus. Ida raris ngusud anake punika, mawastu ipun sami seger.**

**Lukas 5:15 Nanging orti indik Ida Hyang Yesus sayan biakta, tur anake akeh pada rauh mabeled nangkil ring Ida, miragiang paurukan Idane, tur ipun pada kasegerang saking sakancan pinakitipune.**

**Lukas 5:17-25 Sedek rahina anu, rikala Ida Hyang Yesus mapaica paurukan, wenten makudang-kudang anak saking golongan Parisi miwah guru agama miragiang paurukan Idane. Anake punika pada rauh saking desa-desa sawewengkon jagat Galilea miwah wewengkon Yudea miwah saking kota**

**Yerusalem. Kawisesan Ida Sang Panembahan malingga ring anggan Idane buat nyegerang anake sane sakit-sakit. 18** **Raris wenten anak rauh negen anak rumpuh nganggen tandu; tur banget antukipun ngulehang mangda nyidayang ngranjing tur ngenahang sang sakit ring ajeng Ida Hyang Yesus.** **19 Nanging santukan akeh pisan jadmane irika, ipun tan mrasidayang ngranjing. Punika awinannya ipun raris munggah ka raabe. Irika tumuli raabe kabukak, tur sang sakit miwah tandunnyane raris katantan katedunang ring basan tengah anake akeh punika, beneng ring ajeng Ida Hyang Yesus.** **20 Duk Ida Hyang Yesus nytingak kapracayan anake punika, Ida raris ngandika:** “**Ih cening, dosan ceninge suba kampurayang.”** **21 Paraguru agamane miwah anak saking golongan Parisine pada mabaos ring kayunnyane sapuniki:** “**Nyen sasajaane Anake ene? Dadi ia langgana teken Ida Sang Hyang Widi Wasa? Sajabaning Ida Sang Hyang Widi Wasa tusing ada anak ane wenang ngampurayang dosa.”** **22 Nanging Ida Hyang Yesus wikan ring pakayunan danene, mawinan Ida ngandika ring dane sapuniki:** “**Napi awinanipun ragane mapikayun kadi asapunika?** **23 Sane encenke danganan maosang: ‘Dosan ceninge suba kampurayang!’ padayang: ‘Bangunja tur majalan!?’** **24 Nanging mangda ragane uning, mungguing Sang Putraning Manusa Utusan Ida Sang Hyang Widi Wasa madue kuasa ngampurayang dosa ring jagate puniki.**” Ida raris ngandika ring anake rumpuh punika: “**Tiang nguduhang cening, bangun tur tegenza tandun ceninge tur kemaja lautang mulih.**” **25 Duk punika ugi ipun bangun ring arepan anake akeh punika, raris tandunnyane kategen tur ngraris ipun budal sarwi ngluihang Ida Sang Hyang Widi Wasa.**

**Lukas 6:17-19** **Ida raris tedun saking bukite sinarengan ring parasisian Idane, tur mararian ring genahe sane dangsa. Irika akeh parasisian Idane sane tiosan mapunduh sareng anak lianan sane saking wewidangan jagat Yudea miwah saking kota Yerusalem, samaliha saking wewengkon kota-kotane ring pasisi makadi:** **Kota Tirus miwah kota Sidon.** **18 Anake punika rauh nyadia miragiang paurukan Idane miwah mangda kasegerang saking pinakitnyane. Samaliha anake sane karangsukan setan taler segerang Ida.** **19 Anake punika sami ngaat pisan mamanah ngusud Ida, santukan saking anggan Idane medal kawisesan sane nyegerang ipun makasami.**

**Lukas 7:21,22** **Sadaweg punika Ida Hyang Yesus nuju akeh pisan nyegerang anak sane nandang pinakit mawarni-warni miwah karangsukan setan, samaliha akeh anak buta sane kasuecanin, kantos ipun mrasidayang ngeton malih.** **22 Ida raris ngandika ring utusane punika sapuniki:** “**Kemaja uningayang teken Yohanes, sapariunduk ane suba tingalin muah dingeh ragane, nah ento: Anak buta sida ningalin, anak rumpuh nyidayang majalan, anak sakit lepra kasegerang, anak bongol nyidayang ningeh, anak mati kaidupang, buina Orta Rahayune kadartayang teken anake tiwas-tiwas.**

**Lukas 8:2** **Sajaba punika taler wenten makudang-kudang anak istri sane**

**ngiring Ida, inggih punika anak istri sane sampun kasegerang saking karangsukan setan miwah pinakit mawarni-warni, minakadinipun Maria sane kawastanin Maria Magdalena, sane sampun kasegerang saking karangsukan pitung setan.**

**Lukas 9:2 Wusan punika dane kutus buat midartayang mungguing sane mangkin Ida Sang Hyang Widi Wasa ngadegang Pamrentahan Idane saha nyegerang anak sane sakit-sakit.**

**Lukas 9:11 Riwau anake akeh miragi indike punika, ipun raris ngetut pamargin Idane. Ida ledang pisan nampi rauh anake punika. Irika Ida raris midartayang indik Pamrentahan Ida Sang Hyang Widi Wasa ring ipun. Ida taler ngwarasang sakancan anake sane mamuatang kasegeran.**

**Lukas 13:12 Rikala Ida Hyang Yesus nyingak anake eluh punika, raris Ida ngandikain ipun, sapuniki: “Ih eluh, jani eluh suba seger uli sakit eluhe!”**

**Lukas 13:32 Pasaur Ida Hyang Yesus ring dane sapuniki: “Mrikaja ragane ngaturang baos Tiange ringasu ajage punika, kadi asapuniki: ‘Didinane jani muah buin mani Tiang nundung setan muah nyegerang anak sakit, tur didina ane kaping telunne Tiang lakar mragatang gaen Tiange.’**

**Yohanes 5:8,14 Ida Hyang Yesus malih ngandika: “Nah, jani bangunja tur gulung tikeh ragane laut majalanja!” 14 Tan sue, Ida Hyang Yesus manggihin anake punika ring Perhyangan Agung. Ida raris ngandika sapuniki: “Nah, jani ragane suba seger. Suudja ngae dosa, apang eda sengkalane ane gedenan buin nibenin ragane!”**

**Yohanes 14:12 Guru ngorahang teken cening: sasajaane nyenja pracaya teken Guru, ia lakar nglaksanayang pakaryan ane laksanayang Guru. Buina ia lakar nglaksanayang ane luihan teken ento, sawireh Guru lakar nangkil ring Ida Sang Aji.**

**Pamargin Parautusan 3:6 Dane Petrus tumuli mabaos ring ipun sapuniki: “Yen pipis, tiang tusing pesan ngelah, nanging apa ane gelahang tiang, ento ane lakar baang tiang. Masrana kawisesan Ida Sang Hyang Yesus Kristus ane uli kota Nasaret, bangun tur majalanja ragane!”**

**Pamargin Parautusan 5:15,16 Sasampune manggihin katawahan sane kakardi antuk parautusan Ida Hyang Yesus, akeh anake pada ngajak anak sakit ka sisin margine, kasareang ring tabane miwah ring tikehe, mangdane yening Dane Petrus nglintang irika, anake sakit punika keni kaungkulon antuk lawat Dane Petrus. 16 Samaliha akeh anake pada mabered rauh saking kota-kota sane wenten ring samping-samping kota Yerusalem, tur ngajak anak-anak sakit miwah sakancan anak sane karangsukan setan. Anake punika makasami pada kasegerang.**

**Pamargin Parautusan 10:38 Ragane sampun pada uning ring indik Ida Hyang Yesus saking kota Nasaret, sane sampun kaselik tur kalugrain Roh miwah kawisesan antuk Ida Sang Hyang Widi Wasa. Ida sampun lunga nglelana, mapakardi ayu tur nyegerang sawatek anake sane kareh antuk kakuasaan**

**Ratun Setane, santukan Ida kahyangin antuk Ida Sang Hyang Widi Wasa.  
Pamargin Parautusan 19:11,12 Malantaran Dane Paulus, Ida Sang Hyang Widi  
Wasa ngadakang praciri sane tawah-tawah. 12 Kantos wenten anak makta  
saputangan miwah wastra sane pecak kanggen antuk Dane Paulus,  
kagenahang ring anake sakit-sakit, raris anake punika seger, tur soroh  
setane pada makaon saking anake punika.**

**Roma 8:26 Kadi asapunika taler Roh Ida Sang Hyang Widi Wasa ledang tedun  
mapaica pitulungan ring iraga sane lemet puniki. Santukan iraga tan uning,  
asapunapi patutipun iraga ngastawa; nanging Ida Sang Roh ngraga ledang  
mapinunas ring Ida Sang Hyang Widi Wasa buat iraga, sajeroning panulame  
sane tan sida antuk maosang.**

**1 Korintus 12:9 Buat semeton sane tiosan, Ida mapaica kapracayan  
pamantuka ring Ida Hyang Yesus, raris buat semeton sane tiosan, Ida  
mapaica kuasa buat nyegerang anak sakit.**

**1 Korintus 12:28 Ida Sang Hyang Widi Wasa sampun ngamanggehang linggih  
sane mawarni-warni ring pantaran pasamuane, inggih punika: linggih sane  
kaping pisan dados utusan Ida Hyang Yesus, sane kaping kalih dados nabi,  
sane kaping tiga dados guru. Taler wenten semeton sane polih paica  
kabisan buat ngwentenang katawahan, wenten sane kicen kabisan  
nyegerang anak sakit, wenten sane kicen kabisan nulungin anak lianan  
wiadin mimpin anak lian miwah wenten sane kicen kabisan mabaos  
nganggen basa sane tawah-tawah.**

**Pilipi 2:27 Sawiakti ipun gelem, samaliha das-dasan padem. Nanging Ida Sang  
Hyang Widi Wasa sayang ring ipun, maliha boyaja wantah ring ipun  
kewanten, nanging Ida taler sayang ring tiang, mangdane sampunang  
maweweh-weweh kasedihan tiange.**

**Yakobus 5:14 Yening wenten ring pantaran parasemetone sane sungkan,  
gelisang aturin parapanglingsir pasamuane rauh, mangda dane  
ngastawayang sang sungkan, kadulurin antuk kolesin antuk minyak  
masrana nyambat parab Ida Sang Panembahan.**

**1 Petrus 2:24 Ida Sang Kristus ngraga negen dosa-dosan iragane sajeroning  
anggan Idane ring salibe, mangdane iraga prasida mati raga marep ring  
dosa, nanging urip buat malaksana ayu. Semeton sampun kasegerang  
malantaran kanin-kanin Idane.**

**3 Yohanes 1:2 Duh sawitran tiange, tiang ngastawayang apang cening rahayu  
sajeroning saluiring paundukan, buina apanga cening seger, buka jiwan  
ceninge rahayu.**